

A JE' JU'UNA', CAJ U YΛN BAT'AN TS'IBTA PABLO TI' TIMOTEO 1 TIMOTEO

Timoteo ts'ibta'b ten Pablo

¹ Pablojen a teno' tuchi'ta'ben ten C'uj, a mac ij c^λjtaquirex. Bayiri' xan tuchi'ta'ben ten Jesucristo a mac a quic pajico' ca' ij quirej. ² Tan in ts'ibtic tech Timoteo, a je' ju'una' quire' a techo' u tajir in pararech. M^λ' ja wirej, ta wacsaj ta wor u t'Λn C'uj caj a wu'y in tsicb^λtech. In c'at C'uj ca' u yam tech quire' raji' ic Tetex, Timoteo. Quire' in c'at C'uj, ic Tetex, ca' u yajquintech soc m^λna' ba' ca tucric. Ca' qui'ac a wor ten C'uj soc m^λna' ba' ca tucric quire' C'uj ic Tetex, yejer Jesucristo ic Jaj Ts'urirex xan.

Ca' u c^λnant a b^λj Timoteo quire' a ba' tus camsa'

³ C^λ'otej Timoteo quire' ti' y^λn mac, m^λ' ya'ab, cu camsicob u rac'ob ich u rac'ob Efeso. Chen m^λ' u t'Λn C'uj tan u camsicob. Arej ti'ob, Timoteo ca' u p'^λtob u camsicob aro'. Rajen tin chich araj tech ca' p'ataquech ich u cajar Efeso caj bi-neno' tu ru'umin Macedonia. ⁴ Y^λn arej ti'ob a y^λjcams^λy^λjirob soc m^λ' u saricob u xiquinob ti' a ba' tu yubob ti' u nunquirob a m^λ' taji'. Arej ti'ob ca' u rac p'^λticob a rajra' u xaquicob u t'Λn u nunquirob baxuc a tu ju tarob uch. M^λ' ja wirej, u jer a cu yubicob a ti'obo' cu nunquic u t'Λnob. Tu cotor aro' m^λ' ju yamtob ca' u najtob u beyaj C'uj.

Chen cu bin u najtob u beyaj C'uj wa ber q'uin cu quibicob a ba' ts'iba'an ich u t'Λn C'uj.

⁵ A wer biquin quin chich aric tech ca' a chich camsej ti'ob a je' t'Λna'? A je' t'Λna' quir u yajquinticob u yet acsΛ'orirob jerer. A je' t'Λna' quir u yajquinticob a ti'obo' u tajir tu yorob. Tin chich arej ti'ob ca' u yajquintob u yet acsΛ'orirob soc jach tsoy u tucurob. Tan in chich aric ti'ob ca' yajquintacob a ti'obo' quire' tu yacsob tu yorob u t'Λn C'uj soc taj u yajquintic. ⁶ YΛn yΛjcamsayΛjirob, mΛ' ya'abi' tu yΛnech. Tan u tus qui' camsicob a ba' tin wa'ara tech sam. Cu chen nunquicob u t'Λnob rajen mΛna' cu cΛnicob. ⁷ Aro' tu pachticob u yocarob u camsicob u t'Λn C'uj a ts'ibta'b ten u nunquirob Moisés uch. Chen mΛ' ju najtob a ba' cu chich camsicob, cax ya'aricob u ne'erob u t'Λn Moisés.

⁸ Ic toc er tsoy u t'Λn Moisés wa mac u c'at u camsic u t'Λn Moisés an ten bic C'uj u c'at. ⁹ Jari' ca' a najtej a je'ra'. Wa ber caj ts'ibta u t'Λn C'uj Moisés uch caj u ts'ibtaj ti' a mac a cu manob tu si'pirob. MΛ' ju ts'ibtaj quire' a mac a cu manob tu tsoyir, quire' tan u toc quibicob u t'Λn C'uj. MΛ' ja wirej, a mac c'aso' mΛ' ju yubob u t'Λn u nΛ' cax u tet xan. A mac c'aso', cu jach quinsicob u rac'ob tu cotor. A mac a c'aso' cu quinsicob u tet cax u nΛ'. A mac c'aso' mΛ' u c'ujintob jach C'uj. A mac c'aso' quire' yΛn u si'pirob. ¹⁰ MΛ' ja wirej, u t'Λn Moisés caj ts'ibta'b ti' a mac a cu man yejer u jer. Ts'ibta'b ti' a mac a cu man yejer u yet xibir. U t'Λn Moisés ts'ibta'b ti' a mac a cu ya'cric u jer winic. Ts'ibta'b ti' a mac a cu tus, bayiri' ti' a mac a cu chen tus, tan ya'aric u tajir a ba' cu tusic. U t'Λn Moisés ts'ibta'b

ti' tu cotor a c'aso' quire' raji' jach taj u t'Λn Moisés.
11 A je' t'Λna' a quin camsiquech Timoteo, ra'iri' caj u chich araj ten C'uj ca' in tsec'tej uch. Quire' raji' jach manan tsøy u t'Λn a C'uj quire' jach tsøy a C'uj'. MΛna' u jer C'uj a jach tsøy'.

Qui' yor Pablo quire' yajquinta'b ten C'uj

12 Timoteo, quin wac ti' ic Jaj Ts'urirex Jesucristo:

—Bayo', quen ti', quire' ta chichquint in muc' soc in beyaj tech.

Quin wac ti':

—Bayo' Jesús, quire' ta teten ti' a beyaj quire' caj a wiraj c'ucha'an in wor in yamtech. **13** Caj a teten ti' a beyaj cax a ucho' tin p'ast a t'Λn. C'asen a ucho'. Caj in chuc u pachob a tu yacsob tu yorob tech quire' in c'at ch'esob. Chen a techo' C'uj, quen ti', ta yajquin ten rajen ta yamten cax mΛ' toy in wacsej tin wor a t'Λn uch. Rajen mΛ' in wer ba' tin betaji'.

14 Barej ic Jaj Ts'urirex caj u yamten quire' jach carem cu yajquintiquen. Quire' tin wu'yaj mun quin yajquintic C'uj ra' u q'uinin caj in wacsaj tin wor ti' Jesucristo. Rajen quin yajquintic tu cotor mac quire' p'eri' in wor yejer Cristo.

15 U'yej ba' quin wac quire' u jach tajir. Tu cotor mac ca' u quibej xan. Caj tarrij Jesucristo tera' ich yoc'ocab, tar quir u taquic tu cotor mac a cu yac yΛn u si'pir a ti'o'. A teno' Pablojen. MΛna' u jer manan u si'pir bajenen a teno'. MΛ' ya'ab u jer winiquirob a neyΛn u si'pirob. **16** Rajen a C'uj quire' caj u yajquin ten quir u yamtiquen. MΛ' ja wirej, cax mΛna' u jer jach c'as iren a teno'. Caj u yesa nemΛ' bic Jesús'i' soc wa u jer winic cu c'uchur tu q'uinin

yiric. Cu quibic, yacsic tu yor quir u cuxtar munt q'uin. Ma' ja wirej, tu yiraj C'uj tu yajquin ten rajen cu yacsic tu yor. ¹⁷ Rajen ca' ij carex ti' C'uj:

—Jach caremech C'uj. U reyech munt q'uin. Ma'na' u jer irech quire' turiri'ech. Jariri'ech a ne'er tu cotor ba'. Jariri'ech munt q'uinech ma' a quimin. Jariri'ech cu bin s̄ajtechob munt q'uin. Ma'na' mac ch̄aca'an yiriquech. Jeroj.

¹⁸ Quin chich aric tech Timoteo in pararech soc a qui' c̄anantic a je' t'ana'. A caj u tsec'ta tech a wet acs̄orir a ts'a'b u tucur ten C'uj uch. Ma' ja wirej, wa taj ca c'amic u t'lan C'uj a wac'as tucur ma' ju tac' a jo'r. Taj a wacsic ta wor xan. ¹⁹ Ti' yan xib, ma' ya'abi'. A ma' ju yubob u wac'as to'car u jo'r ten u tucurob, rajen tu p'atob u yacsicob tu yorob. ²⁰ Robob Himeneo yejer Alejandro. Robob caj in c'ubob ti' quisin soc u muc'yajob soc u p'aticob u p'asticob C'uj.

2

Pablo cu camsic bic tabar u t'anicob C'uj soc u c̄anicob

¹ Ca' in yan arej tech ajera' Timoteo, ca' a t'anej C'uj ti' tu cotor mac, cax a ma' yerob C'uj. C'amej ti'ob, ca' bin a t'anej C'uj. Arej ti' C'uj ca' u yamtej tu cotor mac. Ca' bin tac mac quir u yamtic tech ta beyaj ca' a warej C'uj:

—Bayo' C'uj, tar u yamten tin beyaj.

Baxuc ca' a t'anej C'uj mac tu cotor:

—Bayo' C'uj, quechex ti', quire' ti' yan tu cotor mac.

² A baywo' ca' a t'anej C'uj ca' u yamtej rey ten C'uj tu cu reyinticob ich yoc'ocab. Ca' a t'anej

C'uj ca' u yamtej tu cu beyaj a jach ts'uro', soc u cha'icob techex a beyajex. Soc qui' a worex, soc mΛ' u ts'iquintiquechexob. Ca'a t'Λnej C'uj ti' u jach ts'urirex a ru'uminex soc u cha'icob a c'ujintiquex C'uj cax tub a c'atex. ³ MΛ' ja wirej, jach tsoy aro' quire' u c'at C'uj yubic a qui' t'Λnic a ti'o'. A baywo' tan a qui'quintic u yor C'uj ij cΛjtaquirex. ⁴ MΛ' ja wirej, a C'uko' u c'at u taquic tu cotor mac. Rajen C'uj u c'at yiricob u c'Λmicob u t'Λn C'uj. ⁵ Quire' ti' yΛn turiri' C'uj baxuc xan ti' yΛn turiri' yΛjsisquinyΛjir yor C'uj quir u yamtic winic. Raji' winic xan, Jesucristo u c'aba'. ⁶ A Jesύso' u bΛjiri' tu cha' u bΛj ca' quinsac u bo'orir quir u taquic tu cotor mac. Aro' raji' caj u ts'a'b u najtic ten C'uj wa ber caj c'uchij tu quimin. ⁷ Rajen quin wa'aric caj u tetajen C'uj uch tan ya'aric ten:

—Jeq'uen, xen, tsec't in t'Λn ich a mac a mΛ' u winiquirob judío.

Rajen tan in camsic ti'ob u t'Λn C'uj soc u yacsicob tu yorob u t'Λn C'uj quire' taj u t'Λn C'uj. A teno' mΛ' jin tus. Taj quin wa'aric tech, Timoteo, quire' tin wacsaj tin wor ti' Cristo.

⁸ Rajen in c'at in wirej xib a mac a jach taj tan yacsicob tu yorob ca' u t'Λnob C'uj tu cu much'quinticob u bΛjob. In c'at in wiric u rΛc t'Λnicob C'uj mΛ' p'ujur u ca'ob soc mΛ' u pacran nunquicob u t'Λnob. In c'at in wiric u rΛc t'Λnicob C'uj taj. In c'at in wiric u t'Λnicob C'uj quire' tsoy a pixamex quire' mΛna' ba' ca tucriquex. Tan u ric'sicob u c'Λbob irob mac tan u chich c'atic ba' ti' C'uj. ⁹ Baxuc xan in c'at in wir a xquico' ca' u buquintob u noc' a jach tsoyo'. Tsoy u buquintic u noc' tsoy, quij, quire' mΛ' quir u pachta'r ten xibi'.

Chen ca' u buquint u noc' soc tsoy yirir ten tu cotor mac. Ma' quir u tus tsic'ticob u jo'r quir u yesicob u tsoyir u jo'r. Ma' quir u tus ujquinticob uj quir yesicob tsoyir u yujob. Ma' quir u tus buquinticob noc' quir u yesicob tsoyir u noc'ob. Baxuc, ma' u buquinticob noc' a jach manan co'oj. Arej ti'ob ma' u jit'icob u jo'r yejer SAC uj a jach co'ojo'. Arej ti'ob ma' u jit'icob yejer oro xan. ¹⁰ Chen a teno' in c'at in wirej a xquico' tan u yamicob u jer quire' tsoy aro'. Ma' ja wirej, baxuco' jach tsoy ti' a xquic quire' yacsmanob tu yorob. A baxuco' tan u qui'quinticob yor C'uj xan, quire' tan u manob tu tsoyir. ¹¹ A xquico' ca' u canob u t'an C'uj. Ma' u yan t'anob cu yubicob u t'ano' ca' u quibob u t'an u jach ts'urirob a tu cu much'quinticob u bjob. ¹² Ma' ja wirej, a xquico' ma' tsoy u camsicob u t'an C'uj ti' xibi' ich tu cu much'quinticob u bjob. Ma' tsoy u cha'bär u ts'urinta'r a xquico' ten xib. Ca' u nup u chi'ob a xquico'. Baxuc in c'at, quij Pablo. ¹³ Quire' caj beta'b winic ten C'uj, tu yan betaj Adán xib. A xquic Eva, pachir caj beta'b ten C'uj. ¹⁴ C'anotej a ucho' ma' tabsa'b ten quisin Adán chen a xquico' tabsa'b ten quisin a Evajo'. Caj tar u si'pir quire' ma' tu canantaj u t'an C'uj. ¹⁵ Rajen a xquico' ma' quir u camsicob xibi'. Chen quir u rochicob u chan ochir. Chen quir u camsicob u chan parar soc u manob tu tsoyir. Chen a xquico' ca' u c'anmob u t'an C'uj soc u yacsicob tu yorob quir u taquicob u bjob, soc ma' u pachticob tu yorob c'as barej ca' u yajquintob C'uj.

*Bic tabar ic tetiquex u ts'urir tu cu
much'quinticob u bΛj*

¹ A je' t'Λna' jach taj. Wa ti' yΛn mac u c'at u
yocar ts'urir u yet acsΛ'orirob soc u yamticob u
c'ujinticob C'uj. Arej tsoy wa ju c'at yocarob. ² A
mac u c'at yocar u ts'urir ca' teta'c ten u bΛjob
quire' tu yirob mΛna' mac u pΛc'mΛnin u pach. Ra'
a yΛn u rac' chen turiri' xquic. A mΛ' q'uex yoro'.
A mΛ' u che'ej ten mac. A toc qui' yoro'. A sΛjta'b
ten tu cotor mac. A mac a c'ucha'an yor u camsic
u rac'ob. A qui' yor yacsic mac tu yatoch, cax mΛ'
yirmΛn uch. ³ A mac a cu bin ocar tu ts'urir mΛ'
ju bin carchΛjΛr. MΛ' ts'ic xan. MΛ' ts'ut, mΛ' ju
pacht u t'ajar u taq'uin. Chen cu man u sisquintej
yorob u rac'ob. ⁴ A mac a cu bin ocar tu ts'urir u yet
acsΛ'orirob. Ca' a tetex a mac cu qui' ts'urinticob
u bΛj tu cotor a cΛja'an yicnΛn soc qui' yorob. Ca'
u qui' t'Λn u parar xan soc tabar yuba'r u t'Λn
ti'. ⁵ MΛ' ja wirej, wa mac u c'at ocar tu ts'urir u
yet acsΛ'orirob. Chen mΛ' ju qui' ts'urinta'r a mac
cΛja'an ich yatoch, je' wa ju c'uchur u yor ti' u yet
acsΛ'orirob? MΛ' ju c'uchur yor ti'. ⁶ Tetex a mac
uch tu yacsaj tu yor. MΛ' tsoy a tetiquexi', tan tu
yacsic tu yor. MΛ' a wacsiquex a mac baxuco' je'xe'
bin u ca' ya'arej:

—Jach caremen a teno'.

Baxuc a quisino' caj ya'araj uch:

—Jach caremen a teno'.

Rajen joc'sa'b quisin ten C'uj uch. ⁷ A mac a cu
bin tetbir yΛn sΛjta' ten a mac a mΛ' yacsmΛnob tu
yorob. MΛ' ja wirej, wa cu sΛjticob, mΛ' ju p'astob
mΛ' ju bin pΛc'bir u pach ten quisin.

Bic tabar yocar beyaj a mac a cu yamtic u b_λjob

⁸ A mac a cu bin tetbir ten u yet acs_λ'orirob soc u yamtic u yet acs_λ'orir tu cu c'ayob. Bayiri' xan y_λn tetbir a cu bin s_λjta'b_λir ten tu cotor mac. Wa cu ya'aric ba', ca' u toc betej, ca' a tetej a mac a m_λ' ju pachtej u t'ajar u taq'uin. A mac a m_λ' ju bin carch_λj_λr. ⁹ A mac teta'b quir u yamtic u yet acs_λ'orirob ca' u qui' c_λnantej ba' toc ara'b ten C'uj ti' tu cotor a yacsmanob tu yorob. Arej ca' u qui' c_λnantej soc jach tsoy u tucur xan. ¹⁰ A ra' xibo' a cu bin tetbir ten u b_λjob bin u ca' u tumtej yirej wa tsoy yorob. Cu ts'ocar yiricob wa tsoy yorob, m_λna' c'as tu betob arej ti'ob, ca' ocacob tu beyaj soc u yamticob u yet acs_λ'orirob. ¹¹ U rac' a xib xano' a cu yocar tu beyaj quir u yamticob u yet acs_λ'orirob y_λn s_λjta'u rac' ten u yet xquiqui'. M_λ' ju p_λc'ar u pach ten mac. M_λ' q'uex yorob xan. Tan u qui' beyajob, cax ba' ts'a'b ti' quir u betej. ¹² A mac a cu bin teta'r ten u yet acs_λ'orirob quir u yamticob. Ca' u raq'uintob chen turiri' xquic soc u qui' ts'urinticob tu cotor mac a c_λja'an tu yatoch yejer u parar soc qui' yorob. ¹³ M_λ' ja wirej, a mac a cu bin teta'r ten u yet acs_λ'orirob quir u yamticob, ca' bin s_λjta'c ten tu cotor mac. M_λ' ja wirej, rajen c'ucha'an yorob u tsicb_λticob ti'ob u t'_λn C'uj ich u rac'ob, soc u yacsicob tu yorob u t'_λn Jesucristo.

U b_λjiri' u muc u er ba' C'uj a ucho'

¹⁴ A teno' tan in pajic in tar in wirech Timoteo. M_λ' jin wer wa seb quin tar wa chan ber quin tar. Rajen tan in ts'ibtic tech a je' ju'una'. ¹⁵ Quire' wa ama'an quin tar toc y_λn tech a je' ju'una' quir u camsiquech bic tabar a t'_λnic a

rac'ob a wet acsa'orirob tu cu much'quinticob u b^λjob. Soc u c'ujinticob C'uj. M^λ' ja wirej, aro' tu cu c'ujinticob C'uj tan u c'ujinticob C'uj a jach cuxa'ano'. Rajen ca' u c^λnantob u t'^λn C'uj soc ch^λca'an yiricob u tajir mac ich yoc'ocab. Bayiri' xan tu cu much'quinticob u b^λjob ra' quir u qui' yamtic u yet acsa'orirob. ¹⁶ U'yej ba' quin wac quire' m^λna' mac cu bin ya'aric:

—M^λ' taji'.

M^λ' bic tabar ic najtej mun jach carem C'uj. M^λ' ju c'uchur ij cor ic najtic bic caj waysa'b C'uj. A C'uko' tu yesaj toc tsoy yor Jesús ber caj ricsa'b ten C'uj. Caj irir Jesús ten y^λjmasirob u t'^λn C'uj caj u tsec'tob u t'^λn C'uj soc yer mac tu cotor u jach tsoyir u t'^λn C'uj. Caj ts'oc u quimin Jesús caj w^λc'as bin ca'anan.

4

Y^λn mac cu bin p'^λt u t'^λn C'uj biq'uin

¹ U Taj'or u Pixam C'uj caj u toc araj to'onex:

—Je' u c'uchur tu q'uinin tabar u xur t'^λn, quij, cu bin u p'^λtob u t'^λn C'uj jun yarob. A cu bin u p'^λtob u t'^λn C'uj, bin u ca' sar u xiquinob ti' a ba' camsa'b ten c'ac'as quisin. Bin u ca' u quibob a mac a cu tusarob a ti'obo'. ² A ba' cu bin camsa' ti'ob je' u camsa' ten y^λjtabsay^λjirob, a mac jach yer tus. Aro' jach manan u c'asir u tucurob ir a mac u tocar u chi' ten quisin. ³ A ray xibo' je' u camsa'r a ti'obo' tan ya'aric: “M^λ' tsoy a raq'uintic xquic, quij. M^λ' tsoy a m^λmintej xib. Y^λn yo'och u jer, quij, m^λ' tsoy a jantic.” Baxuc cu bin u camsa' a cu tus.

M^λ' ja wirej, a C'uko' caj u betaj a wo'ochex soc u janta' ten tu cotor mac. Chen ca' u y^λn arej ti' C'uj:

“Bayo' C'uj”, a mac a yacsmanob tu yorob ti' Jesús.
 4 Quire' tu cotor a wo'ochex toc beta'b ten C'uj soc
 a jantiquex. Rajen c'āmex ti'ob. Ma' a wa'ariquex:
 —Ma' jin c'āmob ti'ob.

Chen a ba' yo'och ca c'āmiquex ca' a yān arex ti'
 C'uj:

—Bayo' C'uj ta ts'a tenob in wo'och.

5 Ma' ja wirej, yān mac cu ya'aric ma' tsoy a
 jantiquex yo'och u jer. Barej yān t'ānex C'uj, arex
 ti' C'uj:

—Bayo' C'uj.

A C'uko' ma' ju ya'arej:

—Ma' a jantiquex ti'ob.

Tsoy a jantiquex ti'ob.

A mac a cu qui' beyaj ti' Jesucristo

6 U'yej ba' quin wac tech, Timoteo. Wa ca camsic
 a bājob an ten bic quin wac tech. Jeroj u jach
 c'urewirech Jesucristo. Jach tsoy u c'urewirech
 Timoteo ti', quire' caj a quib u t'ān C'uj. Ma' chen
 tech tan a quibic u t'ān C'uj bayiri' ten, bayiri' tu
 cotor xan a cu yacsob tu yorob u t'ān C'uj. Ma' ja
 wirej, ma' u tubur tech u t'ān C'uj an ten bic caj a
 wu'yaj in camsiquech. 7 Timoteo, qui' cānant a bāj
 soc ma' a cānic u t'ān a cu ya'arico' ti' u tus C'uj.
 Jot aro' ma' ba'wir ca wa'aric. Barej chichquint a
 wor soc a qui' c'ujintic C'uj soc rajra' cu tajquintic
 a wor. 8 Chen tsoy cu chāc tar u muc' u winquirir
 mac tu cu beyaj. Barej a mac a cu jach c'ānic u t'ān
 C'uj soc u qui' tar yor, aro' jach manan tsoyir. Ma'
 ja wirej, a je'ra' cu yamtiquech soc u qui' tar a wor
 baje'rer. A je'ra' cu yamtiquech soc u pāyiquech
 C'uj ca' bin tac tu q'uinin. 9 Rajen Timoteo, ca' a

quibej a ba' tin wa'araj tech sam quire' taj aro'. Rajen tu cotor mac ca' u quibob. ¹⁰ Rajen tan ic chich beyajex. Rajen tan ic muc'tic u p'astico'on, quire' ij quer C'uj raji' a cuxa'ano'. Ra' u yajtaquir tu cotor mac. Ma' ja wirej, a C'uko' yajyamir tu cotor mac. Jari' a mac a yacsmanob tu yorob u t'an C'uj, raji' cu bin tacbir.

¹¹ Timoteo, quin toc ac tech. Joq'uen cams a ba' a c_λna ten soc a chich aric ti' a b_λjob tu ca bin a camsej ti'ob. ¹² Qui' c_λnant a b_λj Timoteo soc m_λna' mac cu p'astiquech quire' yiric m_λ' uch ch'iijiqueche'. Barej a b_λjob, ca' u c_λnechob bic tabar tsøy u tsicbarob. Ca' u c_λnechob bic tabar u yajquinticob u rac'ob. Ca' u c_λnechob bic tabar u cuxtarob ti' u t'an C'uj ich u rac'ob. Ca' u c_λnechob bic tabar ta wacsa ta wor. Ca' u c_λnechob bic tabar soc m_λ' u ca' acsicob u si'pirob. ¹³ Quire' tabaren. P'is a b_λj a xaqic u t'an C'uj tu cu much'quinticob u b_λjob a wet acs_λorirob. Bayiri' xan, qui' chichquint u yorob quire' tan a camsic ti'ob u t'an C'uj. ¹⁴ Timoteo, m_λ' u nay_λr a wor quire' a beyaj ts'a'b tech ten C'uj. Quire' aro' ta c'_λma tech tu q'uinin caj in ts'anc'_λbtob tech ten yejer u ts'urirob a wet acs_λorirob uch. Caj ts'oc in ts'anc'_λbtob tech, caj oquech ta beyaj ti' C'uj. Ma' ja wirej, tin ts'anc'_λbtob tech quire' ya'arej tenob C'uj.

¹⁵ Y_λn ts'aja'an a wor a c_λnej tu cotor a ba' tin toc arajech sam. Y_λn qui' ts'aja'an a wor a c_λnej u t'an C'uj soc ch_λca'an yiric tu cotor mac. Soc yerob bic tabar tan a qui' quibic u t'an C'uj. ¹⁶ Timoteo, qui' c_λnant a b_λj tu ca bin. Bayiri' xan qui' c_λnant a ba' ca camsic ti' a b_λjob. Ma' u pec a wor tu ca camsic

ti'ob. Wa ju tajir baxuc ca c_λnantic a b_λjiri' je' a taquic a b_λj soc m_λ' ja bin c'ac'. Bayirir' xan bin u ca' u tacob u b_λjob a mac a cu yubicob a camsicob.

5

Caj u chich araj Pablo ti' Timoteo bic tabar u man tu tsoyir ich u b_λjob

¹ M_λ' a y_λn q'ueyic a mac uch ch'ijico'. Barej ca' a chen arej ti'ob ca' u sar u xiquinob a ba' ca wac irech wa robob a tetob. Bayiri' xan, quij, tucrej a m_λ' xura'an u baquerob irob wa ja wits'inob. ² Qui' tucrej a xquic a uch ch'ijico' an ten bic ca tucric a n_λ'. Qui' tucrej a m_λ' xura'an xquico' an ten bic ca yajquintic a wits'inob. Soc wa cu yubic a t'_λn m_λ' ju p_λcob a pacho'.

³ Yamt a xquico' a quimen u mam ucho' wa jach otsirch_λjo'. ⁴ Barej wa ra'iri' xquic a quimen u mamo' y_λn u parar cax u parar u parar. Arej ti'ob ca' u y_λn c_λnant u b_λjob quire' baxuc ca' u betob a mac a cu yacsicob tu yorob. Ca' u c_λnantob u mim cax u chich quire' quimen u mam. Ra' u bo'orir tu ch'isa'b. Ajeroj jach tsoy quire'tan u qui'quinticob yor C'uj. ⁵ M_λ' ja wirej, a mac jach quimen u mam wa cu c_λjtar tu jun_λn. Cax wa m_λna' mac tucric chen C'uj tucric quire'tu yacsu tu yor ti' C'uj. M_λ' ja wirej, aro' m_λ' u p'_λtic u t'_λnic C'uj, cax chun q'uin, cax ac'bir. ⁶ Y_λn a xquico' a quimen u mamo', cu pachticob c'as. Aro' m_λ' cuxa'an yiric C'uji'. Quire' m_λ' tan u jach tucric C'uji'. ⁷ Toc arej ti'ob in wet acs_λ'orir in t'_λn ti' a xquico' a quimen u mamo', Timoteo. A baxuc ta wu'yaj soc m_λna' mac cu bin q'ueyic a ti'obo'. ⁸ Barej wa ti' y_λn maquix m_λ' tan

u jansic u b_λjob, cax a mac jach c_λja'an tu yatoch. Raji' jach manan c'as. A mac a m_λ' tu yacsaj tu yor u t'_λn C'uj m_λ' nec'asi' cax m_λ' tan u jansic u b_λjob.

⁹ Tu ju'unin tu ca ts'ibtic u c'aba' a xquic a quimen u mamo'. A cu beyaj ich tu cu much'quinticob u b_λjob. Ca chen ts'ibtic a mac a tu yiraj sesenta yaxq'uin. A tu m_λmintajob chen turiri' u mamo'. ¹⁰ Tech ca' a qui' irej ich u yet cajarob wa uch qui' beyan_λj a xquico' a quimen u mamo'. Ca' a qui' irej wa tu qui' camsaj u pararob, wa tan u qui' ch'isic uch. Ca' a wu'ye wa tu yacsaj u yet acs_λ'orirob tu yatoch cax m_λ' yirm_λn uch. Cax u p'o'ic yoc uch quire' ec' yoc, quire' u yet acs_λ'orirob, u yaj. Ca' a wu'yej wa tu chichquintaj yor a mac tan u muc'yaj uch. Ca' a wu'yej wa y_λn u jer u qui' beyaj tu c_λja'ano'. Raji'ob ca' a ts'ibt u c'aba' ich u ju'unin tu cu much'quinticob u b_λj.

¹¹ Arej ti'ob Timoteo. M_λ' tsoy u ts'ibticob u c'aba' ich u ju'unin a xquico' a quimen u mamo', wa m_λ' c'ucha'an sesenta yaxq'uin. M_λ' ja wirej, ra' cu bin u pachtej tu yor u m_λmint u jer u mam. Rajen cu tubur ti' u t'_λn Cristo a camsa'b ti'ob ucho'. ¹² Wa cu m_λmintic u jere', je' u ta'ca'r u jo'r ten Cristo quire' m_λ' u quibob a ba' ara'b ten xquic ti' Cristo uch. ¹³ Tu ca'ten a xquic a quimen u mamo', a m_λ' c'ucha'an sesenta yaxq'uino', bin u ca' sut u bur u q'uinin ich u jer naj. Cu c_λnicob m_λ' c'ori'. M_λ' jari' cu c_λnic m_λ' c'ori', cu tus p_λaq'uicob u pachob u rac'ob. Tan u manob ya'arej a ba' m_λ' jach tsoy. ¹⁴ Rajen Timoteo in c'at in wirej a ti'obo', a xquic a chichan a quimen u mam, ca' u m_λmintob u jer u mam. Jach tsoy, ca' u rochob u jer u parar quire' tu ch' u jer u mam. A baywo'

je' u jansicob u parar. Ca' u jansob u mam xan. A xquico' a quimen u mamo' a cu c^λnic u betej aro' m^λ' c'u cha'an yorob u pac'a'r u pachob xquic a quimen u mam uch ten a mac a u p'acticob u t'^λn C'uj. ¹⁵ Quire' toc y^λn xquic a quimen u mamo'. A m^λ' c'u cha'an sesenta yaxq'uin caj ju p'atob u t'^λn C'uj. Caj bin u tus p^λybir u berob ten quisin.

¹⁶ Arej ti'ob Timoteo. Wa ti' y^λn xquic, a yacs^λnob tu yorob. U w^λc'as b^λjob raji' ca' u janse wa quimen u mam. Raji' ca' u jansej soc m^λ' u jansicob u yet acs^λorirob tu cu much'quinticob u b^λjob. A baywo' u yet acs^λorirob c'u cha'an yorob u jansicob a mac otsirch^λjij a tajo' a quimen u mamo'.

¹⁷ Camsej ti'ob Timoteo. Ca' u qui' s^λjtob u jach ts'urirob tu cu much'quinticob u b^λj, quire' cu qui' beyaj. Rajen ca' u s^λjtob u jach ts'urirob. Ca' u qui' s^λjtob u jach ts'urirob a mac a cu camsicob u t'^λn C'uj. A cu qui' tsec'ticob u t'^λn C'uj, xan. Arej ti'ob ca' u qui' bo'otob a ti'obo'. ¹⁸ Rajen c'^λotej a ba' cu yac tu ts'iba'an t'^λn C'uj. A cu ya'aric: "M^λ' tsoy a c'^λxic u chi' a w^λr^λc' wac^λx tu cu beyaj ta corex Tsire'ej u janan a w^λr^λc' wac^λxe", quij. U jer ts'iba'an ich u t'^λn C'uj cu ya'aric: "A mac a cu beyaj ich u jer winic ca' bo'ota'c u bo'orir u c'^λb, quij."

¹⁹ Camsej ti'ob Timoteo. Wa ju c'at u ta'quicob u jo'r turi' u jach ts'urir u yet acs^λorirob. Arej ti'ob ca' u chen quib u t'^λn ca'tur wa tres y^λjirirob. A mac a tu yirob jach taj tu yacsaj u si'pir. ²⁰ Ca' u q'uey u jach ts'urir a yacs^λnob tu yor ^λc^λtan tu cotor mac tu cu much'quinticob u b^λjob quir yubicob u t'^λn C'uj. Ca' u q'uey u jach ts'urir a nanij

yacsic tu si'pir soc u ch'i'icob sajaquir ti' u rac'ob soc m^λ' u yacsicob tu si'pir xan, irob u jach ts'urir.

²¹ A teno' Pablojen. Baje'rer λ c λ tan tu wich C'uj. Bayiri' ich λ c λ tan u wich Cristo Jes^us, quin toc aric tech Timoteo. Bayiri' ich λ c λ tan u wich y λ jmasirob u t' λ n C'uj a teta'anob ten C'uj ca' a quibej tu cotor a ba' tin camsech Timoteo. Ca' a toc betej a ba' quin camsiquech m^λ' coyen a camsic, r λ c quet a camsic.

²² M^λ' seb a y λ n tetic u jach ts'urir tu ca much'quintiquex a b λ j. M^λ' ja wirej, wa cu yacsic u si'pir a mac ta tetaj jero' a rac'ob bin u ca' p λ c' a pachex. Rajen ca' a qui' c λ nan a b λ j.

²³ Quire' su'su' u yajtar a n λ c' Timoteo. M^λ' a chen uq'uic a ja'. Tumtej chichin yo'och u c'ab uva. Je' u jaw λ r a n λ q'ue'.

²⁴ Wa cu tar u ta'quicob u jo'r mac λ c λ tan tech Timoteo. Wa m^λ' ch λ ca'an a wiric a ba' u si'pir y λ n ti'. Ca' a c λ xtej wa taj cu ta'quicob u jo'r. U jer wa jach ch λ ca'an a wiric ba' c'asir caj u betaj quire' tu r λ c irob u rac'ob.

²⁵ Baxuc xan ch λ c y λ n mac cu man u yamt u rac'ob. Yer aro' cu man u yamticob u rac'ob. Barej y λ n u jer tan u man u yamt u rac'ob chen m^λ' yer u rac'ob wa tan u man u yamtic a ti'obo'. Chen je' u c'uchur tu q'uinin cu bin najt u rac'ob.

6

¹ A mac nanij u c'ananta'r ten u jach ts'ur an ten bic a c'urewo'. Cax aro' yacsman tu yor u t' λ n C'uj. Cax c' λ nanac ten u jach ts'urir ca' u s λ j λ t u jach ts'urir soc m^λna' mac cu p'astic C'uj cax a ba' quij camsic.

² U c'urew a tu yacsaj tu yor wa y λ n u ts'urir a tu yacsaj tu yor xan. Arej ti' a c'urewo' m^λ' u p'actic

u ts'urir quire' u yet acs Λ 'orir, cax m Λ ' u cha'b Λ r u bin. Arej ti' ca' qui' qui' beyan Λ qui' ti'. Jach manan caj u beyan Λ c ti' quire' raji' u b Λ job quire' tu yacsaj tu yor. Arej ti', a mac cu qui' iric u bin beyaj ti' u ts'urir cu bin ya'aric:

—Raji' u b Λ job jach tajir quire' aro' u jach yaj xan.

A mac a cu jach c'ujintic C'uj. Bayiri' a mac jach manan qui'yoro'

³ A techo' Timoteo quen. Ca' a camsej a jeroj. Bayiri' ca' a tsec'ti'ob xan. Wa ti' y Λ n mac cu tus camsic u jer t' Λ n tan ya'aric:

—A je'ra' u jach t' Λ n C'uj.

Chen wa m Λ ' quet yejer u t' Λ n ic Jaj Ts'urirex Jesucristo. A mac a cu camsic aro' m Λ ' yer ba'ri'.

⁴ Cax cu tucric tu yor yer tu cotor ba'. M Λ ' ja wirej, a mac a cu camsic baxuco' cu chen pachtic u p'usic yor winic quir u nunca'r u t' Λ n ten mac. Rajen cu tar a c'aso', cu chen pachtic u p'usic yor winic quir u nunca'r u t' Λ n ten mac. Rajen cu tar a c'aso', irej a mac a cu pachtic a ba' y Λ n ti' u jer winic. Rajen cu tar ba' quir u choquintic yor mac. Rajen cu tar a ba' quir u p'astic u jer winic. Ti' aro' cu tar u ts'urir y Λ jpaq'uirob u pach winic a ba' jach c'as. ⁵ M Λ ' ja wirej, a mac cu man u camsicob baxuco'. Rajra' cu nunca'r u t' Λ n quire' jach c'as a ba' cu tucricob. Bayiri' xan, tan u manob tu c'asir. M Λ ' yerob u tajir u t' Λ n C'uj quire' tu p' Λ tob uch. Cu tus camsicob u t' Λ n C'uj, quire' u c'atob u jaricob u taq'uinob. Toc p' Λ t mac baxuco'. ⁶ M Λ ' ja wirej, a mac a cu c'ujintic C'uj u tajir, cu jach man yejer C'uj. M Λ ' ra' u c'at quir u jaric u taq'uin. Quire' qui' yor cax m Λ ' ya'ab u ba'tac. ⁷ Arej Timoteo a ba' y Λ n tech caj u

rochech a n^Δ? M^Δna' ba' y^Δn tech caj u rochech a n^Δ. Bayiri' ca' bin quimco'onex, m^Δna' ba' y^Δn quic bin ic ch'a'ej. M^Δna' ba'. ⁸ Rajen y^Δn to'onex ij co'och. Y^Δn to'onex ic noc'. M^Δ' wa ti'ibiri' quir u qui'quintic ij cori'? ⁹ C^Δnej a je'ra'. A mac a ju c'at u t'aj^Δr u taq'uin soc y^Δn ya'ab bin u ca' tumta'bir yor soc u yacsic u si'pir. Bin u ca' u pacht a ba' c'aso' quire' m^Δ'ju qui' tucrej ba'. Quire' tu pacht u t'aj^Δr u taq'uin. Raji' cu bin p^Δayic u si'pir soc u quimin soc u sa't^Δr u pixam. ¹⁰ M^Δ' ja wirej, tub u tar a jach manan u si'pir? Cu tar to'onex quire' tic yajquintaj taq'uin. C'^Δotej, y^Δn ya'ab mac tu chen pachtaj soc y^Δn u taq'uin ya'ab. Caj u p'^Δtob u c^Δnicob u t'^Δn C'uj. Rajen jach manan yajir u yorob.

Chichquint a wor soc m^Δ' a p'^Δtic u t'^Δn C'uj

¹¹ U'yej ba' quin wac tech Timoteo. A teche', tan a tsec'tic u t'^Δn C'uj. Rajen m^Δ' a c^Δnic a c'aso' a jach c'as a tin wa'araj tech sam. P'is a b^Δj ca' a c^Δnej u t'^Δn C'uj soc u tajtar a wor. C^Δn a qui' c'ujintic C'uj soc taj tan a wacsic ta wor. C^Δn a yajquintic tu cotor mac. C^Δn u t'^Δn C'uj soc nem^Δ' biquechi'. C^Δn u t'^Δn C'uj soc m^Δ' ts'i quechi' soc mix p'ujur xan. ¹² Chichquint a wor soc m^Δ' u tupsa'r a wor ten mac. Qui' acsej ta wor soc tech y^Δnin a cuxtar munt q'uin. M^Δ' ja wirej, a C'ijo' tu p^Δayech soc tech y^Δnin a cuxtar munt q'uin. C'^Δotej y^Δn ya'ab mac tu yubaj ya'ara' a techo' bic tabar caj a quib u t'^Δn C'uj uch. ¹³ Rajen tan in chich aric tech Timoteo ^Δc^Δtan tu wich C'uj a mac a cu ts'ic u cuxtar tu cotor ba'. Tan in chich aric tech ^Δc^Δtan tu wich Jesucristo quire' raji' tu ya'araj ba' ti' Poncio Pilato:

—A teno' u reyen u winiquirob judío.

14 Chich quin wac tech, Timoteo, ca' a quibej tu cotor ba' ara'b ten C'uj. Ca' a qui' c_λnant u t'_λn C'uj soc m_λ' u c'axico' mac, soc m_λna' mac cu p'asticob u t'_λn C'uj. Ca' a qui' c_λnant a baywo', hasta tu q'uinin cu yur ic Jaj Ts'urirex Jesucristo. **15** Ca' bin c'uchuc tu q'uinin. Je' u bin tuchi'bir Jesús ten C'uj ca' tac tera'. M_λ' ja wirej, turiri' C'uko', m_λna' u jer. A C'uko' jach manan tsøy ti' tu cotor mac. A C'uko' raji' cu reyinta'r ten tu cotor rey. Raji' cu ts'urinta'r tu cotor jach ts'ur. **16** Chen raji' m_λ' ju quimin a C'uko', ti' c_λja'an tu sasir tub m_λna' mac cu c'uchur. M_λna' mac yirm_λn a C'uko' m_λ' c'ucha'an yor yiric xan. Ca' s_λjta'c C'uj ten tu cotor mac quire' a C'uko' rajra' y_λn muntq'uin. Jeroj.

17 Arej ti'ob Timoteo. A mac y_λn ya'ab u ba'tac baje'rer, a jach y_λn u taq'uine' xan. Arej ti'ob soc m_λ' u tus tucricob tu yor:

—Jach tsøyen a teno', quire' y_λn ya'ab in ba'tac.

Arej ti'ob. M_λ' u tus tucricob wa je' u to'car ten u taq'uino'. M_λ' ja wirej, chen C'uj cu bin ta'quicob a ti'obo'. M_λ' ja wirej, cu xupur u taq'uinob wa cu r_λc s_λtic. Rajen arej ti'ob ca' u yacsob tu yorob ti' C'uj. M_λ' ja wirej, a C'uko', cu ts'ic to'onex tu cotor ba' soc qui' ij corex. Jach manan cu ts'ic to'onex quir u qui'quintic ij corex. **18** Arej ti'ob Timoteo. A mac a ney_λn u taq'uine' ca' manacob u yamtob mac. A baywo' je' u t'ajar u qui' beyaj _λc_λtan tu wich C'uj. Arej ti'ob ca' u j_λsob u ba'tac ti' u rac'ob soc m_λ' ts'ut. **19** Wa tan u manob u betob aro' bin u ca' ric'sob ich ca'anan a ba' jach tsoyo'. M_λ' ju xupur m_λ' ju satar. Munt q'uin ti' y_λn. M_λ' ja wirej, bin u ca' cuxtarob baje'rere'. Bin u cu ca' cuxtarob jach taj ich ca'anan.

20 A techo', Timoteo, quin wac tech. Qui' c_λnan u tajir a tu ts'a tech Jesús. M_λ' a y_λn u'yic a mac a rajra' cu t'_λn tan u nunca'r u t'_λn, a mac a cu yac u ne'er ba'. M_λ' u jach er ba'ri'. Tus u ca'. **21** Ti' y_λn mac cu tus aric: in ne'er tu cotor ba' ich u t'_λn C'uj. Rajen caj u jen mastaj u tajir u t'_λn C'uj quire' m_λ' ju jach quibaj u t'_λn C'uj. Ca' u qui' c_λnan tech C'uj Jeroj ts'oquij, quij Pablo.

A quet u t'ano' a ric'beno'

New Testament in Lacandon (MX:lac:Lacandon)

copyright © 1978 Wycliffe Bible Translators, Inc.

Language: Lacandon

Translation by: Wycliffe Bible Translators, Inc.

Lacandón [lac], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Lacandon

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
e946bbf1-bc43-5557-a783-a3482d69cb01